

MOLINARO AL SPERE DI RECUPERÂ I FINANZIAMENTS TAL CUADRI DAL ASSESTAMENT DAL BELANÇ, IN JUGN. VICARIO: CENCE BÊÇS, LA SITUAZION E SARÀ GRIVIE

I bêçs pal furlan de Finanziarie regionâl dal 2010

INTERVENT	€ AN 2009	€ AN 2010	DIFERENCE
Trasmissions radiotelevisivis par furlan	400.000	200.000	-200.000
Biblioteche "Joppi" di Udin	50.000	40.000	-10.000
Societât filologjiche furlane	300.000	250.000	-50.000
Universitât di Udin	100.000	/	-100.000
Agjenzie regionâl pe lenghe furlane	1.000.000	800.000	-200.000
Ents ricognossûts (Kappa Vu, Colonos, Istitût Ladin Furlan, La Grame, la Patrie dal Friûl, Glesie Furlane, Onde Furlane, Radio Spazio 103)	332.000	265.000	-67.000
Scuelis	600.000	500.000	-100.000
TOTÂL	2.782.000	2.055.000	-727.000

Font: bilanç de Region Friûl-Vignesie Júlie

Universitât cence risorsis

Tra i ents ricognossûts, l'unic a gjoldi de Finanziarie regionâl dal 2010, e je la associazion culturâl «La Grame» di Merêt di Tombe

INTANT CHE LA minorance slovene, a reson, e fâs fieste par vie che il milion di euros pe sô tutele, taiât dal Stât talian, in gracie dal pressing dal guvier sloven al è stât reintegrât, cjapantlu dal font de Presidence dal Consei, e al va a zontâsi ai 4 milions di euros za previodûts, i furlans a àn di contentâsi dai fruçons che Region e Stât ur dan. Sì, parcè che lis za scjarsis risorsis pe lenghe a son simpri di mancûl. La tabele parsore, che si riferis dome ai contribûts regionâi, e sclaris la situazion.

La Universitât di Udin si cjate nuie di mancûl cence bêçs. Il delegât dal retôr pe lenghe furlane, **Federico Vicario**, al à scrit une letare al assessôr regionâl ae Culture, Roberto Molinaro, domandant di vê indaûr il finanziament. A cuatri voi, «Molinaro mi à dit che al spere di recuperâlu tal quadri dal assestament dal belanç, in Jugn», al conte Vicario. Se cussî nol fos, la situazion e sarès pardabon grivie, pensant sedi ai progjets di ricercje in pits fats dal Cif, il Centri interdipartimentâl di ricercje su la culture e la lenghe dal Friûl, sedi ae funzion de Universitât dal Friûl tant che «ent di alte formazion pai docents di lenghe furlane», previodude de leç 29/2007.

Molinaro al conferme l'impegn pal recupar dal finanziament, «almancûl di une part», e, stant che «il rapuart cu la Universitât al è strategic», al fevele de convenzion quadri tra ateneu e Region pe atuazion de leç 29, «che e metarà a cjâf de Universitât dal Friûl lis funzions de ricercje e de formazion». Sui timps, «le fassarin chest an», al dîs l'assessôr.

La formazion dai insegnants e je fundamentâl, e marche **Silvana Schiavi Fachin**, esperte di educazion plurilengâl, za componente dal Comitât tecnic scientific de Agjenzie regionâl pe lenghe furlane. «La cuestion e va frontade. No si pues pensâ di formâ i mestris ducj intun colp. Parcè no pensâ di valorizâ lis competencis che tai agns tancj brâfs mestris a àn metût adun e che a podaressin zovâ a formâ altris mestris?». Schiavi Fachin e sotlinie ancje lis gruessis difi-

coltâts che si cjatin lis scuelis, penalizadis a fuart dai tais des risorsis regionâls, che si cumbinin cun chei dal Stât. Cun chei bêçs «si fâs pôc e nuie», sedi par chel che al rivuarde i materiâi, sedi la preparazion dai insegnants. «La scuele e je simpri plui puare e taiant – e marche, puartant la sô esperience di confront cun mestris e fameis –, si da une scuse ai dirigents scolastics par no rispuindi ae domande des fameis di insegnâ il furlan ai fis. Ur disin che no àn voie di fâ e nancje i bêçs par fâ».

Par **Pierino Donada**, component dal Comitât tecnic scientific de Agjenzie regionâl pe lenghe furlane, espert di didatiche par furlan, «il probleme vèr al è chel di meti a sisteme l'insegnament de lenghe e de culture furlanis cuntun status juridic, ma ancje finanziari, stabil. Une ativitât cussî impegnative – al dîs Donada – no si pues peâ ogni an a variazions de leç di belanç che a influissin un grum su la cualitât e su lis sieltis des scuelis». Lis scuelis «a àn bisugne di ciertecis. A vivin cui con-

tribûts di Stât, Region, ents locâi. No si pues costruî nuie di systemic cence finanziaments stabîi». Par chest, «si à di puartâ a sisteme i finanziaments tal quadri complessif des leçs su lis lenghis minorizadis, miôr sot di une regje uniche, chê de Region, prin di dut». Donada al cjale al avign: «Bisugne cjatâ, drenti chest an, risorsis siguris pal prossim, che a vedin la garanzie di un flus finanziari». Se no si fronte chest probleme, «si dinee chê politiche regionâl che e à marcât la impuartance di tutelâ la specialitât, che e à ae fonde la varietât linguistiche dal teritori».

Tra i ents ricognossûts, l'unic a gjoldi de Finanziarie regionâl dal 2010, e je la associazion culturâl «La Grame» di Merêt di Tombe, impegnade, dal 1995, «pe promozion de lenghe e des culturis furlanis, des tradizions e des identitâts locâls, inmanent cunvignis, spetacui di folclôr, manifestazions musicâls, teatrâls e cinematografichis, presentazions di libris, cors di furlan e ativitâts tes scuelis», e conte **Eros Cisilino**, component de associazion. Oltri ai finanziaments pal furlan, taiâts ancje in chest câs e che a vignaran ripartîts plui indevant, «La Grame» e gjolt di un finanziament di 70 mil euros (fonds culture a cjapitul). «E je une decision dal Consei regionâl – al dîs Molinaro –, cjapade te suaze de sô autonomie».

ERIKA ADAMI